



Broj: 09/1- 0295 -UO/22
Sarajevo, 24.02.2022. godine

Na osnovu člana 16. Statuta Javne ustanove "Služba za zapošljavanje Kantona Sarajevo" Sarajevo, (broj: 05/1-3306/08 od 22.05.2008. godine, 05/1-0224/12 od 08.02.2012. godine, 05/1-0542/12 od 21.03.2012. godine i 05/1-0867/2016 od 27.06.2016. godine), Upravni odbor Javne ustanove "Služba za zapošljavanje Kantona Sarajevo" Sarajevo je na redovnoj sjednici, održanoj dana **24.02.2022.** godine, *d o n i o*

O D L U K A

I

Donosi se Politika objelodanjivanja imovine i prihoda nosilaca izvršne funkcije u Javnoj ustanovi „Služba za zapošljavanje Kantona Sarajevo“ Sarajevo.

II

Ova Odluka stupa na snagu danom donošenja i objavit će se na web stranici Javne ustanove „Služba za zapošljavanje Kantona Sarajevo“ Sarajevo.

PREDSJEDNIK
UPRAVNOG ODRORA

Muhamed Hasanović



Sarajevo, Đoke Mazalića 3,
web-stranica: www.szks.ba; e-mail adresa: info@szks.ba
Tel: ++387 (33) 569-100, fax: 204-177; Matični broj: 4200304610003;
Poreski broj: 01079085; Računi Intesa Sanpaolo Banka d.d. Sarajevo:
1549212010171056-denozitni račun. 1540012000135120-transakcijski račun



Bosna i Hercegovina
Federacija Bosne i Hercegovine
KANTON SARAJEVO
Javna ustanova "Služba za zapošljavanje
Kantona Sarajevo" Sarajevo
S A R A J E V O



Bosnia and Herzegovina
Federation of Bosnia and Herzegovina
CANTON SARAJEVO
Public Institution "Employment Service of
Canton Sarajevo" Sarajevo
S A R A J E V O

Politika objelodanjivanja imovine i prihoda nosilaca izvršne funkcije u Javnoj ustanovi „Služba za zapošljavanje Kantona Sarajevo“ Sarajevo

Februar, 2022. godine

Objelodanjivanje imovine, prihoda i interesa nosilaca javne funkcije je mehanizam za osiguranje integriteta nosilaca javne funkcije, sprečavanje sukoba interesa i jačanje povjerenja javnosti u rad javnih institucija.

Ko ima obavezu objelodanjivanja imovine i prihoda?

Obavezu objelodanjivanja imovine i prihoda u JU Služba za zapošljavanje Kantona Sarajevo (u daljem tekstu: Služba za zapošljavanje) imaju – direktor Službe za zapošljavanje, predsjednik i članovi Upravnog odbora, te predsjednik i članovi Nadzornog odbora Službe za zapošljavanje.

Zakon o prijavljivanju i postupku provjere podataka o imovini nosioca javnih funkcija u Kantonu Sarajevo („Službene novine Kantona Sarajevo“, broj 18/19, u daljem tekstu: Zakon) reguliše, između ostalog, obavezu prijavljivanja imovine i prihoda za „nosioce izvršnih funkcija“. Nosioci izvršnih funkcija, u smislu Zakona su direktori i zamjenici direktora agencija, fondova, javnih preduzeća, javnih ustanova i institucija čiji je osnivač Kanton Sarajevo, članovi skupština, upravnih i nadzornih odbora direkcija, zavoda, javnih ustanova, javnih preduzeća i drugih institucija u Kantonu Sarajevo koji su izabrani i imenovani, ili je za njihov izbor ili imenovanje data saglasnost od strane zakonodavnog organa Kantona Sarajevo ili Gradskog i opštinskih vijeća ili Vlade Kantona Sarajevo, između ostalih. Prema Zakonu, obavezu prijavljivanja imovine i prihoda imaju i bliski srodnici nosilaca javnih funkcija (bračni i vanbračni drug, dijete, majka, otac, usvojilac i usvojenik).

Zašto objelodanjivanje imovine i prihoda?

- *Unapređenje transparentnosti i integriteta nosilaca izvršne funkcije i jačanje povjerenja građana u rad institucija*

Prihvatanjem izvršne funkcije nosilac ove funkcije prihvata i odgovornost za etično, odgovorno i transparentno djelovanje koje je u javnom interesu. Transparentnost rada, odluka, djelovanja i ponašanja nosilaca izvršne funkcije omogućava nadzor javnosti i procjenu integriteta i odgovornosti nosilaca izvršne funkcije. Nadzor javnosti je neophodan za odgovoran rad javnih institucija jer ih podstiče na dosljednu primjenu pravila o etici, integritetu, sprečavanju sukoba interesa i ublažavanje rizika od nastajanja korupcije. *Konvencija Ujedinjenih nacija protiv korupcije*¹ naglašava da je svrha izvještavanja o prihodima, imovini i interesima javnih službenika postizanje veće transparentnosti javnih institucija i jačanje povjerenja javnosti u javne institucije.

Građani trebaju imati neometan pristup informacijama o radu javne institucije, ali i o privatnim interesima nosilaca izvršne funkcije koji mogu uticati na zakonito i odgovorno obavljanje njihove službene dužnosti. Pojedinačni interesiproističu, između ostalog, iz imovine i prihoda nosilaca izvršne funkcije. Iz ovog razloga je neophodno osigurati dosljednu primjenu propisa o prijavljivanju imovine i prihoda nosilaca izvršne funkcije. Objelodanjivanjem imovine i prihoda nosilaca izvršne funkcije omogućava se uvid javnosti u interes ovih lica i propitivanje integriteta njihovih odluka odnosno da li su donesene u

¹ Dostupno na http://www.apik.ba/zakoni-i-drugi-akti/medjunarodni-dokumenti-i-konvencije/konvencija_ujedinjenih_nacija_protiv_korupcije.pdf.

javnom ili privatnom interesu. Objelodanjivanje imovine i prihoda je u skladu sa principima proaktivne transparentnosti u službi javnog interesa. Lični podaci nosilaca javne funkcije se obavezno obrađuju u skladu sa *Zakonom o zaštiti ličnih podataka*(„Službeni glasnik Bosne i Hercegovine“, br. 49/2006, 76/2011 i 89/2011 –ispr.) radi zaštite privatnosti i sigurnosti ne samo nosilaca izvršne funkcije već i njihovih bliskih srodnika.

- *Sprečavanje sukoba između privatnog i javnog interesa*²

Javni interes mora uvijek biti na prvom mjestu prilikom obavljanja dužnosti u javnoj instituciji. Nosioci izvršne funkcije, kao i svi drugi građani, neizbjegno imaju privatne interese koji proističu iz njihovih bliskih ličnih, poslovnih i/ili političkih odnosa. Prepoznavanje sukoba između javnog i privatnog interesa je lična odgovornost nosioca izvršne funkcije. Nosilac izvršne funkcije ne smije dozvoliti da njegove profesionalne i lične veze, njegovi finansijski i ekonomski interesi kao ni društvena, politička, vjerska ili druga uvjerenja utiču na obavljanje njegovih službenih dužnosti.

Sukob interesa se definiše kao situacija u kojoj privatni interes nosioca izvršne funkcije može uticati ili izgleda da može uticati na donošenje odluka i obavljanje povjerenih zadataka u instituciji, odnosno narušiti principe nepristrasnog i zakonitog postupanja u izvršavanju njegovih službenih dužnosti. Sukob interesa nije korupcija *per se*, ali predstavlja rizik koji može rezultirati korupcijom odnosno povredom službene dužnosti i pribavljanjem nezakonite koristi, ukoliko se sukobom interesa ne upravlja na adekvatan način.

Sprečavanje sukoba interesa i upravljanja sukobom interesa su snažni mehanizmi za očuvanje povjerenja javnosti u rad javnih institucija, jer neriješen sukob interesa može rezultirati gubitkom povjerenja javnosti u nepristrasno, etično, pošteno i na zakonu zasnovano obavljanje dužnosti nosioca javne funkcije. Odluke se moraju donositi i provoditi na transparentan način, uz obavezu prijavljivanja privatnih interesa.

- *Sprečavanje nezakonitog bogaćenja*

Objelodanjivanje imovine i prihoda ima dodatnu funkciju sprečavanja nezakonitog bogaćenja. Obaveza objelodanjivanja se naročito odnosi na lica koja obavljaju visoke javne funkcije, imaju pristup resursima i uticaju, te su u mogućnosti donositi odluke o korištenju javnih sredstava, kao i koristiti svoj uticaj za pogodovanje određenim licima ili grupama. Lica koja obavljaju upravljačke i nadzorne funkcije, koji upravljaju značajnim budžetima, koja su u mogućnosti da utiču na dodjeljivanje ugovora koji se finansiraju iz javnih sredstava, koja imaju značajna diskreciona ovlaštenja u kreiranju uslova i određivanju naknada, taksi i drugih pitanja, te koja imaju pristup privilegiranim informacijama, spadaju u kategorije javnih službenika koji trebaju da imaju najviši stepen odgovornosti prema javnom interesu i javnosti. Objelodanjivanje podataka o imovini i prihodima nosilaca javne funkcije ne samo da direktno omogućava uvid javnosti u srazmjer između prihoda i imovine nosilaca javne funkcije, veći doprinosi kontrolizakonitosti sticanja imovine.

²Sukob interesa regulisan je Pravilnikom o sukobu interesa Javne ustanove „Služba za zapošljavanje Kantona Sarajevo“ („Službene novine Kantona Sarajevo“, broj 47/2019).

Šta podrazumijeva prijavljivanje imovine i prihoda?

Pravovremeno i tačno podnošenje podataka o imovini i prihodima

U skladu sa Zakonom, nosilac javne funkcije je dužan da Uredu za borbu protiv korupcije i upravljanje kvalitetom Kantona Sarajevo (u daljem tekstu: Ured) blagovremeno podnese potpunu i tačnu prijavu cjelokupne imovine i prihoda (uključujući i poklone). Prijave se podnose na propisanom obrascu koji obuhvata podatke o vlasništvu ili suvlasništvu na nepokretnoj imovini, kao i podatke o pokretnoj imovini koja podliježe registraciji ili o pokretnoj imovini vrijednosti većoj od 5.000 KM. Prijavom je neophodno obuhvatiti i imovinu koja se nalazi u inostranstvu, te dati podatke o vrsti imovine, mjestu gdje se nalazi, nabavnoj cijeni i izvoru sredstava kojima je nabavljena. Osim podataka o imovini, u skladu sa Zakonom, nosilac javne funkcije dužan je dostaviti potpune podatke o dionicama, vrijednosnim papirima, finansijskim obavezama, depozitima, dividendama i kamatama u bankama i drugim finansijskim organizacijama, pravima po osnovu autorskih, patentnih i sličnih prava intelektualne svojine, kako u zemlji tako i u inostranstvu. Podaci o visini ukupnih godišnjih prihoda moraju biti prikazani posebno, u odnosu na pojedinačne izvore prihoda. Nosilac javne funkcije je također dužan prijaviti podatke o učešću u nadzornim odborima, upravnim odborima i slično, bez obzira da li se vrše uz naknadu ili bez naknade.

Nosilac javne funkcije dužan je da podnese prijavu o imovini i prihodima u roku od 30 dana od dana preuzimanja javne funkcije, te svake godine u toku obavljanja javne funkcije, najkasnije do 31. januara tekuće za prethodnu godinu, kao i u roku od 30 dana nakon završetka javne funkcije. Pored obaveze redovnog prijavljivanja imovine i prihoda u propisanim rokovima, nosilac javne funkcije dužan je da dostavi podatke o imovini i prihodima uvijek kada Ured od njega to zatraži.

Provjera blagovremenosti, tačnosti i potpunosti prijava o imovini i prihodima

Prijave se provjeravaju u cilju utvrđivanja grešaka ili pogrešno popunjениh prijava i nosilac javne funkcije je dužan da ove greške ispravi u roku od 15 dana po zahtjevu Ureda. Nepravovremeno podnošenje prijave o imovini i prihodima podliježe sankcijama koje se propisane Zakonom.

Ured vrši kontrolu podataka o imovini i izvora prihoda kojima je imovina kupljena, te u slučaju nesrazmjera između imovine i prihoda, kao i osnova sumnje u istinitost podataka i zakonitosti načina sticanja imovine, obavlještava nadležno tužilaštvo i druge nadležne organe. Ured ima pravo da vrši provjeru podataka i u tom smislu ima ovlaštenje da od svih nadležnih institucija, te pravnih i fizičkih lica zatraži podatke potrebne za provjeru. Ured obrađuje lične podatke u skladu sa odredbama Zakona o zaštiti ličnih podataka, a isključivo u cilju provjere tačnosti navoda u prijavama imovine i prihoda nosilaca javne funkcije.

Objavljivanje podataka o imovini i prihodima

Podaci o imovini i prihodima nosilaca javne funkcije su dostupni javnosti i objavljuju se na službenoj web stranici Ureda, kao i podaci o odbijanju dostavljanja prijava i druge nepravilnosti. Ured je nadležan za uspostavljanje registra o prijavljenoj imovini i prihodima (uključujući i poklone) koji redovno ažurira. Registr je dostupan javnosti u pretraživoj formi na <https://www.anticorruptiks.com/registrar-podataka-o-imovini>. Nosilac javne funkcije ima pravo uvida u svoje lične podatke o imovini koji se vode u Registru i pravo da zahtijeva da se njegovi lični podaci o imovini, za koje se utvrdi da su netačni ili da su pogrešno navedeni ili obrađeni na drugi način koji je suprotan zakonu i pravilima koji se odnose na obradu podataka, isprave, izbrišu ili blokiraju. Rok čuvanja podataka iz prijava je pet godina nakon prestanka javne funkcije.

Opredijeljenost nosilaca izvršne funkcije u

JU Služba za zapošljavanje Kantona Sarajevo za dosljednu primjenu pravila o prijavi imovine i prihoda

- Povjerenje korisnika naših usluga, građana i javnosti u rad JU Služba za zapošljavanje Kantona Sarajevo je ključna vrijednost ove ustanove, direktora, članova Upravnog odbora i Nadzornog odbora, te drugih rukovodilaca i zaposlenih, koju želimo kontinuirano i dosljedno promovisati.
- Nastojimo jačati povjerenje u naš rad tako što poduzimamo mjere za osiguranje integriteta i nepristrasnosti svakog nosioca izvršne funkcije u obavljanju službenih dužnosti i donošenju službenih odluka.
- Opredijeljeni smo da služimo javnom interesu i javnom dobru te dopromovišemo organizacionu kulturu koja ne toleriše neetično ponašanje, sukob interesa i korupciju. Korištenje pozicije u Službi za zapošljavanje i korištenje imovine Službe za zapošljavanje za sticanje lične koristi, te pogodovanje drugim licima za sticanje nezakonite koristi je suprotno javnom interesu.
- Svjesni smo da odricanje od privatnih interesa predstavlja našu dužnost prilikom preuzimanja javne funkcije i da javni interes mora uvijek biti na prvom mjestu prilikom obavljanja službene dužnosti.
- U situacijama kad nije moguće odreći se privatnog interesa, opredijeljeni smo za transparentno upravljanje sukobom interesa kako bi se onemogućilo ili dovelo u sumnju donošenje odluka pod uticajem bliskih ličnih, poslovnih ili političkih odnosa. Obavezujemo se da ćemo u svim situacijama sukoba interesa objelodaniti svoje interes i izuzeti se izpostupanja i donošenja odluka.

- Smatramo da nemamo razloga za bojazan od objelodanjivanja svoje imovine i prihoda, a samim tim i privatnih interesa, ukoliko nam je prioritet profesionalan odnos sa korisnicima usluga Službe za zapošljavanje građanima, kao i zakonito i transparentno postupanje i donošenje odluka.
- U potpunosti smo opredijeljeni za dosljedno poštivanje zakona i pravovremeno, potpuno i tačno podnošenje prijava o imovini i prihodima u skladu sa Zakonom o prijavljivanju i postupku provjere podataka o imovini nosioca javnih funkcija u Kantonu Sarajevo, shvatajući da i na ovaj način doprinosimo jačanju povjerenja javnosti u naš rad.

Sarajevo, Doke Mazalića 3,
web-stranica: www.szks.ba; e-mail adresa: info@szks.ba
Tel/:+387 (33) 569-100, fax: 204-177; Matični broj: 4200304610003;
Poreski broj: 01079085; Računi Intesa Sanpaolo Banka d.d. Sarajevo:
1549212010171056-depozitni račun, 1540012000135120-transakcijski račun

